



Pasaran saham terima masuk bersih RM6.3 bilion

September 4, 2022 @ 12:11pm



Abdul Wahid berucap pada Karnival Saham Pahang Bersama Bursa Malaysia di Kuantan -
Foto BERNAMA

KUANTAN: Pasaran modal domestik kekal teratur dengan pasaran ekuiti mencatat aliran masuk tunai bersih sebanyak RM6.3 bilion setakat Julai lalu biarpun dalam keadaan tidak menentu kebelakangan ini, kata Pengurus Bursa Malaysia Bhd, Tan Sri Abdul Wahid Omar.

Beliau berkata, pasaran modal Malaysia turut berkembang dengan jumlah permodalan pasaran berjumlah RM1.79 trilion atau 116 peratus daripada Keluaran Dalam Negara Kasar (KDNK) pada akhir 2021.

Menurutnya, pengembangan berterusan pasaran modal domestik itu turut mewujudkan peluang simpanan alternatif serta instrumen pelaburan lebih meluas untuk segmen runcit yang membolehkan penyertaan orang awam.

"Selaras dengan perkembangan Malaysia ke arah sebuah negara yang berpendapatan tinggi, pasaran modal domestik juga harus menggalakkan lebih banyak penyertaan pelabur runcit bagi memangkin pertumbuhan ekonomi dan menyokong pertumbuhan jangka panjang dan mampan negara," katanya.

Beliau berucap pada Karnival Saham Pahang Bersama Bursa Malaysia di Kompleks Yayasan Pahang yang dirasmikan oleh Menteri Besar, Datuk Seri Wan Rosdy Wan Ismail dan turut dihadiri oleh Timbalan Menteri Kewangan 1, Datuk Mohd Shahar Abdullah, di sini, semalam.

Dalam pada itu, Abdul Wahid berkata sejumlah 34 syarikat senaraian awam terbabit dengan aktiviti di Pahang yang membabitkan jumlah permodalan pasaran sebanyak RM108.5 bilion atau tujuh peratus daripada KDNK.

"Bagi segmen runcit, secara amnya purata nilai dagangan harian (ADV) dalam kalangan pelabur runcit menunjukkan sedikit penurunan daripada RM1.6 bilion pada 2020 kepada RM1.3 bilion pada 2021 dengan pembabitan Pahang masih di tahap rendah," katanya.

Sehubungan itu, Abdul Wahid menyifatkan program Karnival Saham Pahang menjadi sebahagian daripada usaha Bursa Malaysia untuk menyuntik kesedaran masyarakat negeri itu mengenai pelaburan awal, sekali gus meningkatkan bilangan pelabur runcit.

Menurutnya, initiatif utama lain termasuk Bursa Marketplace yang mengetengahkan alat pelaburan utama bagi mempelajari asas-asas pelaburan manakala Bursa Academy iaitu platform e-pembelajaran sehenti menawarkan ilmu mengenai tiga pasaran iaitu ekuiti, derivatif dan pasaran modal Islam.

Selain itu, beliau turut mengingatkan mengenai lonjakan skim penipuan pelaburan dan kemunculan individu 'pakar pelaburan' tidak bertauliah berikutan ketidaktentuan pasaran global yang boleh mencetuskan ancaman kewangan kepada pelabur baharu.

"Adalah penting untuk pelabur mempunyai pengetahuan serta alat pelaburan yang betul bagi mengelak daripada menjadi mangsa penipuan pelaburan itu," katanya.

Sementara itu, bercakap kepada pemberita, Wan Rosdy berharap rakyat Pahang bijak untuk membuat keputusan pelaburan yang tepat.

"Program ini amat baik untuk memberi pendedahan pelaburan kepada masyarakat. Apa yang penting adalah mempunyai ilmu untuk melabur sama ada di bursa saham atau (unit amanah) ASB," katanya.

-BERNAMA